

E desaroyo entre 2021-2022 i na 2025

Kalidat di e akohida di mucha na Hulanda Karibense

Aprel 2026

Na 2025, Inspekshon di Enseñansa huntu ku inspekshon lokal a investigá kalidat di e akohida di mucha na Boneiru, Saba i Sint Eustatius. P'esaki, nos a bishitá tur e 79 lokalidatnan pa akohida di mucha, akohida despues di skol, i gastouderopvang. E rapòrt aki ta kontené e resultadonan di e investigashon aki, tambe kompará ku kalidat di e akohida di mucha na 2024 i na 2021-2022.

Prólogo

Mas i mas, doñonan di akohida di mucha na e islanan BES Boneiru, Sint Eustatius i Saba ta enfoká riba mehorashon di kalidat. Esei ta nifiká ku ta stimulá e muchanan mas i mas mihó den nan desaroyo. Mi ta hopi kontentu ku e desaroyo aki.

Na mes momentu, tin preokupashonnan tambe. Ta sigui difísil pa haña sufisiente kolaboradó ku bon formashon. E echo ku hopi kolaboradó no tin un Deklarashon tokante Kondukta (VOG) ta ekstremadamente vulnerabel. Realmente mester bin un kambio lihé den esei.

For di 2026 nos ta traha ku un kuadro legal nobo a base di kual por hasi mantenshon di lei mas estrikto.

Ademas nos ta wak mas detayadamente kiko ta bai bon, kiko por mihó, i kiko mester bai mihó. Nos ta publiká e resultadonan di e investigashonnan na e lokalidatnan di akohida di mucha riba nos wèpsait.

Alida Oppers
Inspektor general di Enseñansa



E puntonan di mas importante

- Kalidat di e akohida di mucha na Hulanda Karibense a mehorá for di dia ku a kuminsá ku e programa BES(t) 4 kids i for di dia ku inspeksion ta supervisá e kalidat. Partikularmente e kalidat di e proseso di akohida di mucha i e kuido di kalidat a oumentá. Esei ta nifiká ku ta stimulá e muchanan mihó den nan desaroyo.
- Mas i mas, e direktiva di e akohida di mucha ta enfoká riba mehorashon di e kalidat di e akohida di mucha. Ta importante pa doñonan di akohida di mucha (sigui) desaroyá riba e punto aki.
- Tambe nos ta mira espasio ainda pa mehorashon. Mehorashon ta posibel, pasobra tin lokalidatnan ku e baluashon Bon tambe, ku doñonan di akohida di mucha di otro lokalidatnan por siña di dje.
- Ta importante pa e doñonan sigui duna atenshon na e VOG-nan i na e nivel di formashon di e profeshonalnan.
- Riba promé di yanüari 2026, e Lei Akohida di Mucha BES a drenta na vigor. For di e fecha ei, nos ta supervisá a base di un kuadro di investigashon nobo ku ta kontené tur lei i regulashon. Ainda, tur aña nos ta investigá kalidat di akohida di mucha na tur lokalidat, huntu ku e inspektornan lokal di e Entidatnan Públiko. Por mira tur rapòrt tokante e lokalidatnan di akohida di mucha riba nos wèpsait [Toezichtresultaten](#).

Pakiko nos a hasi e investigashon aki?

Na 2019 e programa BES(t) 4 kids a kuminsá. Den e programa aki, e Entidatnan Públiko Boneiru, Sint Eustatius i Saba i e ministerionan SZW, OCW, VWS i BZK ta traha ku tur esnan envolví na nivel lokal riba fortalesementu di e akohida di mucha na Hulanda Karibense (BES(t) 4 kids). Huntu ku e doñonan di akohida di mucha i e gastoudernan ta hasi esfuerso pa subi kalidat di e akohida di mucha. Riba petishon di e Entidatnan Públiko, Inspeksion di Enseñansa ta supervisá esaki for di 2020. For di yüni 2021, nos ta supervisando aktivamente tur e lokalidatnan di akohida di mucha na e 3 islanan. Tur aña nos ta kontrolá kalidat di e akohida di mucha, e akohida despues di skol i e gastouderopvang. Esei nos ta hasi huntu ku e inspektornan lokal na e islanan. Nos a saka rapòrtnan tokante esei kada aña. E rapòrtnan anual aki ta riba nos wèpsait: [Rapporten kinderopvang Caribisch Nederland | Caribisch Nederland | Inspectie van het Onderwijs](#).

Riba promé di yanüari 2026, e Lei Akohida di Mucha (Wet kinderopvang BES) a drenta na vigor. Esei ta nifiká ku na 2025 pa último biaha nos a usa e kuadro di investigashon bieu, basá riba e 3 ordenansanan insular. Den e rapòrt aki nos ta duna e estado manera e tabata na 2025, tambe kompará ku e kalidat na 2024 i e kalidat na 2021-2022, ora a hasi e promé midimentu.

Kiko nos a investigá?

Huntu ku e inspeksion lokal na e 3 islanan nos a wak e siguiente preguntanan:

1. E akohida di mucha ta kumpli ku e eksigensianan riba tereno di atministrashon, personal i alohamentu
2. Ta stimulá e muchanan sufisientemente den nan desaroyo?
3. E akohida ta seif i saludabel pa mucha?
4. Direktiva di e akohida di mucha ta guia dirigí riba mehorashon di kalidat?

Inspeksion lokal a investigá (sin anunsio previo) kalidat di e akohida di mucha riba tereno di Atministrashon, personal i alohamentu, i Seguridat i klima di akohida di mucha (pregunta 1 i 3). Ora di konstatá fayonan, nos tabata hasi palabrashonnan di rekuperashon ku un término di rekuperashon. Inspeksion tabata investigá (ku anunsio previo) e kalidat di e Proceso di akohida di mucha i Guia, kuido di kalidat, i ambishonnan (pregunta 2 i 4).

Nos a investigá na 2025 tur e lokalidatnan di akohida di mucha (Dagopvang, DO akohida di mucha), akohida despues di skol (BSO) i gastouderopvang (GOO) ku sigun e registrashon di e Entidatnan Públiko ta disponé di un pèrmit di eksplotashon. Na tur, esakinan ta 79 lokalidat:

- 68 na Boneiru: 28 akohida di mucha, 34 akohida despues di skol, i 6 gastouderopvang;
- 8 na Sint Eustatius: 4 akohida di mucha i 4 akohida despues di skol;
- 3 na Saba: 1 akohida di mucha i 2 akohida despues di skol.

E resultadonan di 2025 ta basá riba e 79 lokalidatnan aki.

Kambionan entre 2021-2022 i na 2025

Entre 2021-2022 i na 2025, e kantidat di lokalidat na e islanan a kambia. Den e tabèl akibou por mira e kantidatnan di lokalidat di akohida di 2021-2022, 2024, i 2025. Den e rapòrt aki nos ta kompará solamente lokalidatnan ku nos a evaluá den tur e añanan. Dor di esei por mira diferensianan den e kantidat total di lokalidat den e diferente añanan.

Tabèl 1. Bista general di e kantidat di lokalidat di akohida di mucha na 2021-2022, 2024 i 2025

	Total 2021-2022	Total 2024	Total 2025	Komparashon 2025 i 2021-2022*	Komparashon 2024 i 2025**
Total Boneiru	57	68	68	47	60
DO	24	27	28	19	25
BSO	30	36	34	25	31
GOO	3	5	6	3	4
Total Sint Eustatius	8	9	8	7	8
DO	5	5	4	4	4
BSO	3	4	4	3	4
GOO	0	0	0	0	0
Total Saba	2	3	3	2	3
DO	1	1	1	1	1
BSO	1	2	2	1	2
GOO	0	0	0	0	0
Total	67	80	79	56	71

* Pa e komparashon di e kalidat na 2021-2022 i 2025, nos a hasi uso di e datonan di e lokalidatnan ku nos a investigá tantu na 2021-2022 komo na 2025.

** Pa e komparashon di e kalidat na 2024 i 2025, nos a hasi uso di e datonan di e lokalidatnan ku nos a investigá tantu na 2024 komo na 2025.

Kiko ta e resultadonan di mas importante na 2025?

Den e rapòrt aki nos ta deskribí e resultadonan di mas importante tokante e kalidat di e akohida di mucha na Hulanda Karibense na 2025. Den e kapítulo aki nos ta kompará e resultadonan aki ku e kalidat na 2024. A mustra esaki den e figuranan akibou. Eiden tin e standartnan i e eksigensianan ku ta kai bou di nan. E huisianan i balorashonnan riba tur e standartnan ku a investigá i e eksigensianan ku ta kai bou di nan ta den e rapòrt tékniko. E rapòrt tékniko ta riba wèpsait di Inspeksion di Enseñansa: [Inspectie van het Onderwijs | Inspectie van het onderwijs](#)

Un marka di kontrol ☒ ta indiká ku ta bai bon.
Un krus ☐ ta indiká ku por mihó i
un triángulo ☐ ta indiká: paga tinu!



Eksigensianan riba tereno di Atministrashon, Personal i Alohamentu

Pèrmit di eksplotashon

Eksigensia: e doño di e sentro di mucha tin un pèrmit di eksplotashon i ta kumpli ku e eksigensianan ku e Entidat Públiko a stipulá pa esei.

- ☒ Na 2025 kasi tur e lokalidatnan tin un pèrmit di eksplotashon (válido).
- ☐ Sin embargo, mayoria lokalidat no ta kumpli ku e kondishonnan di e pèrmit di eksplotashon, manera e eksigensianan akibou riba tereno di personal i alohamentu.


Personal – estudio

Pa Boneiru ta konta ku tur profeshonal mester disponé di un estudio mbo-3. Pa Sint Eustatius i Saba, e profeshonalnan mester disponé di un estudio mbo-2. Ademas ta konta na Boneiru ku, minimalmente 3 dia pa siman mester tin un profeshonal na nivel mbo-4 presente. Pa Sint Eustatius i Saba, esaki ta un estudio mbo-3.

- ✓ Mas i mas profeshonal tin un estudio mbo (3 òf 4) ku ta spesífikamente dirigí riba señalá retraso di siñamentu i di desaroyo.

- ✓ EHBO: e kantidat di lokalidat kaminda tin minimalmente 1 adulto presente pa duna promé asistensia na mucha i kaminda ta sigui e training anual di EHBO di mucha, a oumentá kompará ku 2024. Partikularmente den e akohida di mucha esaki a mehorá. Mayoria di e lokalidatnan ta kumpli ku e dos eksigensianan aki na 2025.
- ✗ Nivel di estudio: na mas ku mitar di e lokalidatnan, no tur e profeshonalnan ta disponé di un estudio pedagógiko na e nivel rekerí (2025). Esaki ta komparabel ku 2024.

Figura 1. Estudio di e personal na tur e lokalidatnan na 2025 (n=79) i e huisionan na 2024 i 2025 (n=71)



Nota 1: No semper ta evaluá standartnan, por ehèmpel ora nan no ta aplikabel;. Pa algun standart, esaki ta e pouta pa gastouderopvang (pa mas informashon, wak e Rapòrt Tékniko).

- * Pa Boneiru ta konta ku profeshonalnan mester disponé di un estudio mbo-3. Pa Sint Eustatius i Saba profeshonalnan mester disponé di un estudio mbo-2 (CVQ-2).
- ** Pa Boneiru ta konta ku e profeshonal mester tin un estudio na nivel mbo-4. Pa Sint Eustatius i Saba esaki ta un estudio mbo-3 (CVQ-3)


Personal – VOG

Tur hende ku ta traha na un sentro di mucha mester disponé di un Deklarashon Tokante Kondukta (VOG) aktual. Mester warda e VOG-nan aki den e atministrashon di e doño di e akohida di mucha.

- ✗ Na 2025, hopi lokalidat durante e investigashon anual ketu bai no ta kumpli ku e eksigensianan relashoná ku e VOG-nan:
 - Na kasi mitar di e lokalidatnan, ketu bai no tur hende tin un VOG.
 - Na mas ku un tersera parti di e lokalidatnan, e VOG-nan tabata mas ku 3 aña bieu, òf no tabata aktualisá e VOG-nan kada dos aña.

- Na kasi un tersera parti di e lokalidatnan, e doño di e sentro di mucha no tabata warda e VOG-nan serka su atministrashon.
- ✗ Durante e investigashon anual, nos ta mira un deterioro den poseshon di e VOG-nan kompará ku 2024. E motibunan pa no kumpli ku e eksigensia aki entre otro ta kambionan di personal, tumamentu den servisio di personal promé ku a fasilitá e VOG, (no ta na altura di) e echo ku mester di un VOG nobo ora bai un otro doño di akohida di mucha i di e echo ku tin biaha ta tuma tempu promé ku fasilitá e VOG.
- ⚠ For di promé di yanüari 2026 nos ta supervisá esaki ku estrikamente i nos por duna e Unidat SZW di RCN konseho pa imponé butnan ora un doño di akohida di mucha/gastouder no tin e VOG-nan na òrdu mas ku un biaha.

Figura 2. VOG-nan na tur e lokalidatnan na 2025 (n=79) i e huisianan na 2024 i 2025 (n=71)



Personal – uso di personal


Serka e standart aki nos ta husga si e kantidat di profeshonal ta kumpli ku e eksigensianan i si ta kumpli ku e eksigensianan pa uso di profeshonalnan ku ainda ta den formashon i di stazjèrnan.

- ✓ **Uso di profeshonalnan:** na 2025, tres kuarta parti di e lokalidatnan tin suficiente profeshonalnan.
- ✗ **Proporshon profeshonal – mucha:** Kompará ku 2024, tin ménos lokalidat ku ta kumpli ku e proporshon entre profeshonalnan i e kantidat di mucha rekerí. Esaki por sosodé por ehèmpel ora tin mucha ku a start na e akohida kaba, siendo ku tin otro muchanan ku ta bai kumpli 4 aña pronto i ta bai enseñansa

básiko. E ora ei temporalmente tin demasiado mucha na e lokalidat. Un otro ehèmpel ta ku e doño di e akohida di mucha ta inkluí miembronan di personal ku no ta kumpli ku e eksigensianan, manera un asistente, den e proporshon di profeshonal-mucha. E motibu pa esaki tambe ta ku ta difísil pa haña personal adekuá.

✗ **Uso di stazjèrnan:** Na 2025, no tur lokalidat ta kumpli ku e eksigensianan relashoná ku uso di stazjèr. Di tur e lokalidatnan ku a investigá, tin 34 ku no ta tene kuenta sufisientemente ku e fase di estudio ku e stazjèr ta aden. Ademas, nan no ta kumpli ku e kondishon pa no inkluí stazjèr den kalkulashon di e kantidat di profeshonal.

Figura 3. Uso di stazjèr i proporshon profeshonalnan/mucha na 2025 (n=79) i e huisianan na 2024 i 2025 (n=71)




Alohamentu

Serka e standart aki, nos ta kontrolá si e lokalidatnan ta kumpli ku e eksigensianan pa e espasionan paden i pafó.

- ✓ Na 2025, seguridat, aksesibilidat i aptitut di e espasionan paden i pafó a mehorá kompará ku 2024.
- ✗ Na mas ku mitar di e lokalidatnan, e espasionan paden i pafó ketu bai no ta seif, aksesibel i ekipá di forma adekuá.

Figura 4. Alohamentu na 2025 (n=79) i e evaluashonnan na 2024 i 2025 (n=71)



Stimulá mucha den nan desaroyo

Oferta

Ora di husga e oferta, nos ta wak entre otro e programa ku e lokalidatnan ta usa pa reta e muchanan den nan desaroyo rekreando. Tambe nos ta wak interior di e espasionan, i si e materialnan di wega ta kuadra ku e nivel di desaroyo di e muchanan.

- ✓ Na 2025, mas ku tres kuarta parti di e lokalidatnan e oferta ta suficiente (50 ta Suficiente i 5 ta Bon).

- ✓ Notabel ta ku na 2025 tin algun lokalidat ku ta haña un evaluashon Bon. Esei ta mihó ku den e añanan anterior. Asina, e lokalidatnan aki tin un oferta kaminda ta deskribí metanan i áreanan di desaroyo pa e muchanan ku mester di sosten èkstra òf retonan èkstra. Regularmente ta evaluá e oferta i adaptá a base di esaki, eventualmente.
- ⚠ E kantidat di lokalidatnan kaminda nos ta husga e oferta ku Por mihó ta igual ku na año 2024.

Bista riba desaroyo

Durante evaluashon di e standart Bista riba desaroyo, nos ta wak entre otro si e lokalidat ta kompilá informashon tokante desaroyo di kada mucha riba e diferente áreanan di desaroyo. Nos ta wak tambe si nan ta hasi esaki ku un instrumento di opservashon.

- ✓ Meskos ku na 2024, resultado di e standart Bista riba desaroyo a mehorá: tin mas lokalidatnan ku ta haña un evaluashon Suficiente òf un Baluashon Bon pa esaki. Na lokalidatnan ku ta haña un baluashon Bon, ta sigui desaroyo di mucha

- sistemátikamente i tin un aserkamentu dirigí pa muchanan ku mester di yudansa èkstra òf hustamente un reto èkstra. Ademas, e lokalidatnan aki tambe ta envolví otronan, manera ekspertonan eksterno i mayornan, den e sosten di e desaroyo di e muchanan.
- ✗ Tòg, na mas o ménos mitar di e lokalidatnan, nos ta evaluá e bista riba desaroyo di e muchanan komo Por mihó. Ta asina ku algun lokalidat no ta sigui e desaroyo di e muchanan sistemátikamente. Otro lokalidatnan no ta sigui e desaroyo di e muchanan riba tur e áreanan di desaroyo, òf no ta kompará e desaroyo di e muchanan ku e desaroyo sperá. Dor di esei, no tin

klaridat tokante si e muchanan ta kai atras òf hustamente ta kana dilanti den nan desaroyo. Esei ta hasié difísil pa kolaboradónan pedagógiko sinkronisá nan aktuashon i nan oferta riba esaki.

Aktuashon pedagógiko-educativo

Durante evaluashon di e aktuashon pedagógiko-educativo, nos ta wak entre otro si e profesionalnan ta reta e muchanan rekreando den nan desaroyo. Nos ta wak por ehèmpel tambe si e profesionalnan ta stimulá e muchanan den nan independensia.

- ✓ Na tres kuarta parti di e lokalidatnan, na 2025 nos ta evaluá e aktuashon pedagógiko-educativo komo Sufisiente.


- ✓ Na 5 lokalidat nos ta evaluá e aktuashon pedagógiko-educativo komo Bon. Partikularmente serka e gastouder-nan, nos ta mira un imágen positivo (3 di 5 ta Bon). Na e lokalidatnan ku a haña un evaluashon Bon, nos ta mira kolaboradónan ku ta sòru pa envolvimentu aktivo di e muchanan, ta reakshoná aktivamente riba e nesesidat di desaroyo di e muchanan, i ta yuda e muchanan mas aleu ku e siguiente paso den nan desaroyo. E kolaboradónan pedagógiko tambe ta stimulá e interakshon entre e muchanan.

Kolaborashon

Pa e standart aki nos ta evaluá si e lokalidat ta kolaborá ku mayornan i ku e skolnan básiko (den kuadro di traspaso), i si, kaminda ta nesesario, nan ta envolví partnernan di kuido eksterno.

- ✓ Kasi tur e lokalidatnan ta kolaborá ku otro instansianan.
- ✓ Serka 19 lokalidat, nos ta evaluá e kolaborashon ku un Bon. Ehèmpelnan di esaki ta e kolaborashon struktural i intensivo ku skolnan, mayornan, i otro partnernan na e islanan.

Figura 5. Stimulá mucha den nan desaroyo na 2025 (n=79) i e huisionan i evaluashonnan na 2024 i 2025 (n=71)




Nutrishon

Serka e standart aki nos ta husga si e eksplotadó ta sòru pa bon nutrishon.

- ✓ Serka mayoria lokalidat, e muchanan ta haña nutrishon saludabel i variá kada dia di siman.
- ✓ Esei ta un mehorashon kompará ku 2024.

Figura 6. Nutrishon na 2025 (na 2025) i e huisianan na 2024 i 2025 (n=71)




Seguridat

Serka e standart aki nos ta husga e maneho di seguridat i salubridat pa e doño di e akohida di mucha, i si a deskribí e prinsipio di kuater wowo den e plan di akshon.

- ✓ Na 2025, algu mas ku mitar di e lokalidatnan tin un maneho di seguridat i salubridat. Esei a mehorá hopi kompará ku 2024.

- ✓ Mayoria di e lokalidatnan a deskribí e prinsipio di kuater wowo den nan plan di seguridat. Esei ta nifiká ku tin un plan di akshon ku ta pone ku semper tin un otro adulto ku por mira òf tende un kolaboradó. Esei tambe a mehorá kompará ku 2024.
- ✗ Na mes momentu, e maneho di seguridat ta kumpli ku e eksigensianan ku ta pone pa esei únika mente na un tersera parti di e lokalidatnan. Esei ta komparabel ku 2024.

Figura 7. Maneho di seguridat na 2025 (n=79) i e huisianan na 2024 i 2025 (n=71)




Klima pedagógiko

E standart Klima pedagógiko ta parse e standart Aktuashon pedagógiko-educativo ku nos a deskribí anteriormente den e rapòrt aki. E klima pedagógiko ta tokante ofresementu di un klima pedagógiko sostenedor ku ta kontribuí na desaroyo di kompetensianan personal, sosial, i di sosiedat. Ademas nos ta evaluá si un doño ta disponé di un plan di maneho pedagógiko, i si e doño ta aktua sigun esei.

- ✓ Na mayoria lokalidat tin un klima positivo.
- ✗ Na 20 lokalidat, e klima pedagógiko no tabata na òrdu durante e investigashon anual. Den un òf mas grupo na e lokalidat aki, por a papia di un ambiente intrankil i e kolaboradónan pedagógiko no tabata koregí komportashon indeseabel. Ademas, no tur kolaboradó pedagógiko tabata anda ku e muchanan di un manera sensitivo i responsivo.

- ⚠ Meskos ku nos a konstatá na 2024, esaki realmente mester mehorá. Un klima pedagógiko positivo ta un kondishon pa desaroyo di mucha. Kaminda e kalidat pedagógiko tabata (hopi) alarmante, nos a hasi palabrashonnan tokante rekuperashon ku e doño i nos a duna un término di rekuperashon korto.
- ✗ Mas ku mitar di e lokalidatnan na 2025 no tin un plan pedagógiko (kompleto) i/òf no ta aktua a base di esei.
- ⚠ Na 2024 nos a konstatá ku esaki mester mehorá, i na 2025 ketu bai esei ta e kaso. E echo ku e doñonan di akohidanan di mucha no tin e plan di maneho pedagógiko na òrdu ta preokupá nos. Den e legislashon for di 2026 tambe un plan di maneho pedagógiko ta obligatorio, i tin diferente eksigensianan legal ku e plan mester kumpli kuné.

Figura 8. Klima pedagógiko na 2025 (n=79) i e huisianan na 2024 i 2025 (n=71)



Guia pa mehorashon di e kalidat

Vishon, ambishon i metanan

E standart aki ta tokante e pregunta si e sentro di mucha tin un vishon komun tokante bon akohida di mucha, a redaktá metanan i ambishonnan pa esei, i ta guía dirigí riba logro di nan.

- ✓ E (doñonan di e) lokalidatnan a pasa den un desaroyo na 2025 ku formulashon di vishon, ambishon, i metanan.

- ✓ Mas o ménos mitar di e lokalidatnan ta haña e huisio Suficiente, i 8 lokalidat den e aña aki ta haña e baluashon Bon. No ta evaluá e standart aki serka e gastoudernan.
- ✗ Tòg, ketu bai mas ku un tersera parti di e lokalidatnan no ta traha dirigí riba meta i a base di un plan riba mehorashon di kalidat di e akohida di mucha. E lokalidatnan aki por ehèmpel no a deskribí un vishon tokante e kalidat, òf no a formulá (suficiente) metanan konkreto pa mehorá e kalidat.

Guia pa ehekushon i kultura di kalidat

Den e standart aki, e ehekushon ta sentral. E sentro di mucha mester realisá e metanan pa bon akohida di mucha, sòru pa kondishonnan básiko esensial i, ora nesesario, hasi ahustenan interino.

- ✓ Na mas i mas lokalidat, e direktiva na 2025 ta sòru pa un kultura profesional i pa promoshon di ekspertisio di e personal. Por ehèmpel, nan ta envolví e personal serka

mehorashon di e kalidat di e lokalidatnan, entre otro dor di laga e metanan di desaroyo di tantu e personal komo e metanan di e lokalidat bin bèk den e kòmbersashonnan ku e personal.

- ✓ Nos ta evaluá Guia pa ehekushon i kultura di kalidat na 47 lokalidat komo Suficiente.
- ✓ Nos ta balorá 16 lokalidat ku un Bon pa e parti aki. Esaki ta un duplikashon kompará ku 2024. Na e lokalidatnan aki, e direktiva i e personal kontinuamente ta traha huntu riba (mehorashon di e) kalidat.


Evaluashon, responsabilisashon i diálogo

Durante e investigashonnan standart aki nos ta investigá si e sentro di mucha sistemátikamente ta evaluá i analisá si ta realisá e metanan. Tambe e ta trata di e pregunta si mester ahustá e maneho, i si ta envolví stakeholdernan interno i eksterno den un diálogo.

- ✓ E baluashon di Evaluashon, responsabilisashon i diálogo a mehorá kompará ku 2024.

- ✓ Tin mas i mas lokalidatnan ku un baluashon Bon.
- ✗ Tòg, mehorashonnan ta posibel ainda riba tereno di kuido di kalidat: na mas ku mitar di e lokalidatnan ainda no por papia di sufisiente evaluashon, responsabilisashon, i diálogo. Esaki ta pasobra e lokalidat ainda no a formulá metanan di mehorashon, òf dor ku no tin evaluashon di e metanan ta tuma lugá sistemátikamente.

Figura 9. Guia pa mehorá e kalidat na 2025 (n=79) i e huisianan i evaluashonnan na 2024 i 2025 (n=71)



Kiko a kambia entre 2021-2022 i 2025?

Na 2021-2022 nos a investigá 67 lokalidat. Di esenan, na 2025 nos a investigá 56 di nobo. E otro lokalidatnan a sera den e periodo interino. Serka e 56 lokalidatnan aki, nos a kompará e kalidat di e akohida di mucha na 2021-2022 ku 2025. Nos a wak e kantidat di lokalidat ku den e áreanan di kalidat pa mas ku mitar di e standartnan a haña un huisio Sufisiente/baluashon Bon, òf un huisio Ta kumpli.

Mehorashon di kalidat entre 2021-2022 i na 2025

Den tabèl 2 nos ta mira ku e kalidat di e áreanan di kalidat Atministrashon, Personal & Alohamentu i Seguridat & Salubridat a sigui praktikamente igual. Pa e doñonan di e akohidanan di mucha ta sigui

ta difisil pa kumpli ku e eksigensianan riba tereno di eksigensianan di estudio i VOG. E kambionan frekvente di personal posiblemente tin un papel den esaki. Tambe, nos ta mira ku personal for di e akohida di mucha ta duna preferensia na un trabou den enseñansa pa motibu di e kondishonnan laboral sekundario mihó.

E proseso di akohida di mucha i e guia di kalidat sí a kambia den e añanan ku ta tras di lomba. Na 2021-2022 kaminda ainda ménos ku un kuarta parti di e lokalidatnan a kumpli ku mas ku mitar di e eksigensianan di e áreanan di kalidat Proceso di akohida di mucha i Guia, Kuido di kalidat & Ambishon, na 2025 mas ku tres kuarta parti di e lokalidatnan ta kumpli ku mas ku mitar di e eksigensianan.


Tabèl 2. Diferensia entre Sufisiente/Ta kumpli ku e standartnan

	Atministrashon, Personal & Alohamentu i Seguridat & Salubridat		Proseso di akohida di mucha i Guia, Garantia di kalidat & Ambishon	
	2021-2022	2025	2021-2022	2025
Mitar òf ménos di e standartnan ta Sufisiente òf Ta kumpli	6	7	43	12
Mas ku mitar di e standartnan ta Sufisiente òf Ta kumpli	50	49	13	44

Sin embargo, ainda tin espasio pa mehorashon. Na algun lokalidat, e oportunidatnan pa mehorashon partikularmente ta den e standartnan den e áreanan Atministrashon, Personal & Alohamentu, i Seguridat & Salubridat. Na otro lokalidatnan ta trata hustamente di mehorashon den e áreanan di kalidat Proseso di akohida di mucha & Guia, Kuido di kalidat i Ambishon. Kalidat di

e lokalidatnan aki pa loke ta trata e áreanan di kalidat menshoná realmente mester mehorá. Tin 2 lokalidatnan tambe ku ta kumpli ku tur e standartnan riba e terenonan aki. Mas lokalidatnan ainda (24) ta kumpli ku e standartnan den e áreanan di kalidat Proseso di akohida di mucha i Guia, Kuido di kalidat & Ambishon.

Figura 10. Kantidat ku e huisio sufisiente den e áreanan di kalidat na 2021-2022 i 2025



KP: Proseso di akohida di mucha, SKA: Guia, Kuido di kalidat i Ambishonnan, APA: Atministrashon, Personal i Alohamentu, VK: Seguridat i salubridat

Konklushonnan i rekomendashonnan

Kalidat di e akohida di mucha na Hulanda Karibense for di kuminsamentu di e programa BES(t) 4 kids i e supervishon riba e kalidat di e akohida di mucha a mehorá. Esei ta konta partikularmente pa e kalidat di e proseso di akohida di mucha i e kuido di kalidat: ta stimulá e muchanan mas den nan desaroyo. Ademas, e direktiva di e akohida di mucha ta guia hopi mas frekuentemente dirigí riba mehorashon di e kalidat di e akohida di mucha. Tambe nos ta mira espasio pa mehorashon. E espasio ei t'ei tambe pa lokalidatnan ku e huisio Suficiente, pasobra tin lokalidatnan ku un baluashon Bon; otro lokalidatnan por siña di esaki. Akibou tin rekomendashonnan pa diferente gruponan di enfoke.

🔊 Un yamada na e profeshonalnan

- Pa por traha den akohida di mucha, bo mester tin un VOG aktual (maksimalmente 2 aña bieu) ku ta konektá na e doño di e akohida di mucha ku bo ta traha p'e. Pues sòru pa bo tin e.
- E akohida di mucha ta kambia kada bes.
Tin komprondementunan nobo, i e eksigensianan ku ta pone pa e akohida di mucha ta kambia. P'esei, sòru pa bo sigui na altura i ku bo ta sigui desaroyá bo mes. E ora ei kada bes bo ta bira mihó den bo trabou.
- Pa bira mihó den bo trabou, bo por siña di otronan tambe. Pidi yudansa i formashon si bo ke sigui desaroyá bo mes mas aleu, i yuda un kolega ora bo mira ku tin algu ku e ta haña difísil. Den e base di dato di train di BES(t) 4 kids tin mas informashon pa profeshonalnan den e sektor di akohida di mucha: [Tools - BES\(t\)4 kids](#). Hasi uso di esaki pa mehorá bo konosementu profeshonal, haña komprondementunan nobo, i traha dirigí riba bo desaroyo profeshonal.
- Lesa e manual Akohida di mucha.

🔊 Un yamada na e doñonan di akohida di mucha di e lokalidatnan i e gastoudernan

- Sigui enfoká riba mehorashon di tantu e kalidat di e akohida diario komo e desaroyo mas aleu di maneho.
- Buska sosten ku mehorashon di e kalidat, i hasi uso di e oferta di sosten di e coach(nan) pedagógiko. Tambe hasi uso di e base di train di BES(t) 4 kids: [Tools - BES\(t\)4 kids](#).

- Sigui stimulá e profeshonalnan aktivamente pa logra un nivel di estudio mas haltu, i duna guia i sosten dirigí riba esaki.
- Tin lokalidatnan ku pa gran parti tin nan kalidat na òrdu kaba. Otro doñonan di akohidanan di mucha i gastoudernan por siña di nan. Bishitá otro i siña di otro pa mehorá e kalidat.
- Entrante promé di yanüari 2026, e Lei akohida di mucha BES (Wet kinderopvang BES) ta na vigor. Sòru pa bo ta i ta sigui na altura di lei i regulashon nobo. Tambe wak esaki riba: [Wet- en regelgeving - BES\(t\) 4 kids](#).
- Lesa e manual Akohida di mucha.

🔊 Un yamada na e Entidatnan Públiko

- Konsiderá aselerashon di proseduranan atministrativo manera VOG i pèrmitnan di estadia i di trabou pa e grupo profeshonal di akohida di mucha, di moda ku por pone personal traha mas lihé i por kombatí e défisit di personal.
- Kontinuá e sosten i e guia di doñonan di akohidanan di mucha i gastoudernan, tambe dirigí riba e eksigensianan nobo ku ta na vigor for di promé di yanüari 2026 pa e akohida di mucha.
- Sòru ku tin suficiente alohamentu adekuá i pagabel pa lokalidatnan di akohida di mucha.

🔊 Un yamada na Gobièrnu Sentral

- Sigui sostené e doñonan di akohidanan di mucha, gastoudernan, i kolaboradónan pedagógiko den e añanan benidero pa kumpli ku e eksigensianan ku a inkluí den e Lei akohida di mucha BES (Wet kinderopvang BES).
- Yuda hasi e sektor di akohida di mucha mas atraktivo pa traha aden, por ehèmpel via mihó kondishonnan laboral pa e akohida di mucha na e islanan, i asistensia ku realisashon di un cao.
- Sòru pa suficiente posibilidatnan di estudio adekuá i aksesibel pa e grupo di profeshon aki.
- Sigui alerta pa señalan di e doñonan di akohida di mucha i gastoudernan na e islanan tokante kalidat i finansia, i guia kaminda ta nesesario i posibel (entre otro via e prueba di introdukshon di e Wko BES na 2026). Inkluí e supervishon tambe.
- Evaluá e implementashon di e Lei akohida di Mucha BES (Wet kinderopvang BES) i inkluí e supervishon tambe.

Kiko ta sigui?

Riba promé di yanüari 2026 e Lei Akohida di Mucha BES ([Wet kinderopvang BES](#)) a dreña na vigor. For di e fecha ei, nos ta supervisá a base di un kuadro di investigashon nobo ku ta kontené tur lei i regulashon ([Kaders toezicht kinderopvang Bonaire, Saba en Sint Eustatius | Inspectie van het Onderwijs](#)). Aínda kada aña nos ta investigá kalidat di e akohida di mucha na tur e lokalidatnan. Nos ta hasi esaki huntu ku e inspektornan lokal di e Entidatnan Públiko. For di promé di yanüari 2026 nos ta publiká tur e rapòrtnan tokante e lokalidatnan di akohida di mucha riba nos wèpsait [Toezichtresultaten](#).

Otro investigashonnan resien

- [Eindrapport bestandsopname kwaliteit kinderopvang Caribisch Nederland](#) (Rapòrt final midimentu nulo kalidat akohida di mucha Hulanda Karibense)
- [Tussenmeting kwaliteit kinderopvang Caribisch Nederland in 2023](#) (Midimentu intermedio kalidat akohida di mucha Hulanda Karibense na 2023)
- [Kwaliteit van de kinderopvang op Bonaire, Saba en Sint Eustatius in 2024](#) (Kalidat di e akohida di mucha na Boneiru, Saba i Sint Eustatius na 2024)

Kolofon

Potrèt página dilanti: Lincoln Charles

Inspekshon di Enseñansa
P.O. Box 2730 | 3500 GS Utrecht
© Inspekshon di Enseñansa | aprel 2026

Por download un kopia di e publikashon aki for di wèpsait di Inspekshon di Enseñansa: www.onderwijsinspectie.nl.

Por haña e Rapòrt tékniko tambe riba wèpsait di Inspekshon di Enseñansa: [Inspectie van het Onderwijs | Inspectie van het onderwijs](#).